



Inzko podnio izvještaj Vijeću sigurnosti UN-a: Na putu ka stabilnosti i napretku u BiH očigledno još uvijek ima suštinskih izazova

Podnoseći svoj redovni izvještaj o odvijanju procesa provedbe mira u Bosni i Hercegovini pred Vijećem sigurnosti Ujedinjenih naroda, visoki predstavnik Valentin Inzko pozdravio je pozitivan razvoj situacije zabilježen tokom proteklih šest mjeseci u BiH. To uključuje i činjenice da je vlastima BiH u decembru 2016. godine upućen Upitnik EU, okončano je prilagođavanje Sporazuma o stabilizaciji i pridruživanju i usvojena je takozvana Revizija odbrane koja se odnosi na vojne snage.

Istovremeno, visoki predstavnik Inzko je napomenuo da se Bosna i Hercegovina i dalje suočava sa izazovima u vezi sa osiguranjem održive stabilnosti i napretka. Visoki predstavnik je ukratko naveo ozbiljne izazove s kojima se BiH suočavala tokom proteklih šest mjeseci, uključujući i kontroverze u pogledu zahtjeva za potencijalnim provođenjem revizije, upućenog Međunarodnom sudu pravde, i koracima koji su poduzeti u cilju implementacije neustavnog referenduma u RS.

Naglašavajući činjenicu da je do predstojećih općih izbora ostalo još nekih osamnaest mjeseci, visoki predstavnik je pozvao vlasti u BiH da maksimalno iskoriste predstojeći period i pokažu da su spremni da ostave po strani pitanja koja vode ka podjelama i provedu konkretnе reforme koje će poboljšati ekonomsku situaciju u entitetima i u cijeloj BiH.

„Prve na ovoj listi bi trebale biti ekonomske reforme čije provođenje zahtijevaju međunarodni kreditori BiH, kao i pitanja u vezi sa EU, kako bi se otvorila mogućnost da u budućnosti BiH stekne rani status kandidata za članstvo u EU“, rekao je visoki predstavnik i dodao da će za provođenje ovih zadataka biti potrebna stalna pažnja i opredijeljenost međunarodne zajednice.

Visoki predstavnik Inzko je podsjetio da se 22. maja obilježava 25 godina od prijema Bosne i Hercegovine u članstvo UN-a, nakon preporuke Vijeća sigurnosti pod predsjedavanjem tadašnjeg austrijskog stalnog predstavnika,

ambasadora dr. Petera Hohenfellnera.

„Možemo, a po mom mišljenju i moramo, nastaviti pružati institucionalnu podršku i viziju utemeljenu na integraciji i funkcionalnosti“, zaključio je visoki predstavnik Inzko.

Kliknite ovdje za integralni tekst obraćanja visokog predstavnika Vijeću sigurnosti UN-a.